


# AUKU tidak sekat kebebasan pelajar

S.4 04/06/08 MS 16

"Adalah kurang tepat untuk menyatakan AUKU antara penyebab prestasi kurang cemerlang BN."

■ KASTHURI JEEVENDRAN,  
NURHAFIZA HASAN,  
SHARIFAH AZMAWATI SYED  
ABDUL AZIZ, MOHD  
ZAILANI ABD RAHMAN



Suara dari  
Parlimen

**KUALA LUMPUR** - Akta Universiti dan Kolej Universiti 1971 (AUKU) adalah akta yang menjadi yang menjadi sumber kuasa kepada penubuhan, 'system governan' dan tadbir urus sesebuah universiti awam negara ini termasuk aspek tata laku pelajar.

Demikian ulasan Timbalan Menteri Pengajian Tinggi YB Datuk Idris Harun menjawab soalan Datin Paduka Datuk Nor Hayati Tan Sri Datuk Sri Onn yang menyoal adakah AUKU perlu diperkemas bagi memastikan bakal graduan memahami dasar dan arah tuju negara serta apakah perlu pengkaji sejarah proses kemerdekaan diwajibkan bagi memastikan dasar penganugerahan kerakyatan dan Dasar Ekonomi Baru (DEB) diperjelaskan dengan terperinci di pusat pengajian tinggi.

"Kementerian sedar bahawa AUKU mempunyai beberapa peruntukan yang perlu diberi perhatian dan perubahan yang sesuai akan dilakukan untuk memberi ruang yang lebih luas dan menjadikan Institut Pengajian Tinggi Awam (IPTA) lebih progresif dan berkualiti," katanya pada sidang Dewan Negara semalam.

"Kementerian telah menubuhkan satu Jawatankuasa Menyemak dan Mengkaji AUKU dan ia berfungsi untuk meneliti, mengkaji dan membuat cadangan pindaan terhadap AUKU.

"Pindaan ini bertujuan untuk menambah baik peruntuk-



IDRIS HARUN

an yang sedia ada yang akan memberi kebaikan kepada semua pihak termasuk pelajar-pelajar sendiri," katanya.

Idris berkata, bagi memastikan bakal-bakal graduan memahami dasar dan arah tuju negara, pihak IPTA juga ada menganjurkan program-program kokurikulum yang bercorak patriotik dan cintakan negara seperti program Malam Ambang Kemerdekaan pada malam merdeka, pertandingan pidato serta perbahasan, subjek dalam kuliah seperti Hubungan Etnik, Tamadun Islam dan Tamadun Asia (TITAS) serta program Bakti Siswa yang kerap dianjurkan

oleh universiti.

Beliau turut disoal oleh Senator Heng Seai Kei yang menyoal tentang AUKU yang kerap menyebabkan ketegangan dan konflik antara mahasiswa dengan pentadbir IPTA selain bertanya adakah keputusan pilihan raya baru-baru ini menunjukkan sokongan golongan pengundi muda hilang dan adakah ia berkaitan perasaan kurang puas hati yang telah lama terpendam terhadap sekat dan juga pendekatan pentadbiran sejak zaman universiti mereka.

"Berbagai-bagai analisa yang telah dibuat terhadap prestasi Barisan Nasional (BN) dalam pilihan raya lepas tetapi adalah kurang tepat untuk menyatakan AUKU antara penyebab prestasi kurang cemerlang BN," ulas Idris Harun.

"AUKU sebenarnya tidak menghalang mana-mana pelajar untuk bergiat dalam kegiatan yang konstruktif dan Kementerian tidak pernah menghalang pelajar untuk menyertai mana-mana pertubuhan dengan syarat ianya bukan satu pertubuhan haram atau menyalahi mana-mana perundangan dan peraturan yang dikuatkuasakan oleh kerajaan," jelasnya.